

Cabaran Dakwah di Malaysia Sebelum dan Selepas Merdeka

Abdul Ghafar bin Don
Badlihisam Mohd.Nasir

Abstrak

Dakwah Islamiah di Malaysia mempunyai asas sejarah yang unik. Penemuan beberapa bahan bukti seperti batu bersurat, batu nisan, dinar emas dan sebagainya adalah menunjukkan Islam telah bertapak ke Negara ini sejak sekian lama. Cara dan proses penyebaran dakwah melalui peranan para ahli sufi dan pedagang Muslim memperkukuhkan kedudukan Islam ke Negara ini. Di period sebelum kemerdekaan, proses perjalanan dakwah dan cabarannya tidaklah begitu kompleks namun terpaksa berhadapan dengan situasi yang agak kritikal, misalnya tercetusnya konflik Kaum Tua-Kaum Muda. Selepas kemerdekaan, cabaran dakwah menjadi lebih rencam, beragam dan lebih kritikal. Jumlah penduduk yang semakin bertambah lagi majmuk, masalah pendekatan, cabaran menangani masalah dalaman umat Islam, pertentangan dengan lain-lain ideology dan kepercayaan adalah antara cabaran yang mendepani dakwah di abad baru. Artikel ini cuba membincangkan isu-isu berkaitan cabaran dakwah di Malaysia sebelum dan selepas merdeka.

Kata Kunci: Cabaran, dakwah, Malaysia, merdeka

Pendahuluan

Dakwah secara asasnya adalah usaha mengajak manusia kepada Allah, iaitu supaya manusia tunduk mengabdikan diri kepada Allah sekaligus menghakis segala bentuk syirik dan kefasadan. Kebangkitan para rasul silih berganti yang diakhiri dengan Nabi Muhammad sebagai utusan (rasul) terakhir adalah berperanan mengajak manusia kepada

pengabdian diri kepada Allah secara total. Pengabdian diri kepada Allah akan menjelmakan watak manusia yang soleh dan menyumbang kepada pembinaan tamadun manusiawi yang unggul. Sejarah perjuangan para rasul dalam menyebarkan kalimah *tayyibah* (la ilaha illallah) telah menyaksikan pelbagai cabaran yang terpaksa ditempuh. Hal ini, sudah menjadi sunnah dan tabiat dalam tugas dakwah yang akan dilalui di setiap zaman dan semua pendakwah. Di Malaysia, hakikat yang sama, iaitu cabaran dalam berdakwah juga dirasai Cuma dalam situasi dan keadaan yang berbeza.

Kepentingan Dakwah

Kepentingan dakwah dapat difahami di atas asas bahawa kemampuan manusia adalah terbatas. Perbezaan zaman, tempat, budaya dan *bi'ah* (persekitaran) menyebabkan manusia berselisih dalam menentukan matlamat hidup yang sebenar. Manusia juga tidak mampu mengetahui perkara yang berada di alam yang di luar jangkauan pancaindera mereka, iaitu berkaitan dengan aspek metafizik (al-umur al-ghaibiyat). Perbezaan kerana faktor yang dinyatakan tersebut juga menyebabkan manusia berkhilaf dalam mentafsirkan dasar-dasar hidup. Di antara contoh perselisihan itu ialah mengenai mafhum (kefahaman) tentang keadilan (al-adl). Boleh jadi sesuatu perkara itu dianggap adil di satu bi'ah tertentu, sedangkan di dalam bi'ah yang lain ia dianggap zalim. Contoh yang lain ialah tentang konsep kebebasan (al-hurriyah) yang ditafsirkan dengan perspektif yang berbeza di antara seseorang dengan individu yang lain atau di antara satu masyarakat dengan masyarakat yang lain.

Kerana perbezaan tanggapan dan kefahaman manusia mengenai prinsip-prinsip dan nilai hidup tersebut, maka dengan ini tidak dapat dinafikan bahawa manusia perlu kepada dakwah. Ini kerana dakwah mengandungi ajaran-ajaran Penciptanya (Allah) yang mendalam dan mempunyai hikmahnya yang tersendiri. Tuhan yang bersifat mengetahui rahsia-rahsia ciptaan secara zahir dan batin dan mengetahui kemaslahatan manusia secara individu dan kolektif (jama'ah) dan mengetahui maslahat mereka secara berkekalan dan pasti. Dakwah Islamiah menyediakan sistem/manhaj hidup untuk semua (syamilah lil jami⁶) dan meletakkan asas dan garis panduan hidup yang jelas bagi manusia. Secara umumnya, dakwah Islamiyah di Malaysia boleh

dibahagikan kepada dua period atau fasa, iaitu period sebelum dan selepas merdeka:

Senario Dakwah Sebelum dan Selepas Merdeka

Proses perkembangan dakwah di Malaysia adalah berkait rapat dengan kedatangan Islam ke Negara ini. Menurut D.G.E Hall (1961), kedatangan Islam ke Negara ini bermula pada abad ke-15 Masehi yang bermula di Melaka. Kebanyakan sejarawan mengandaikan Islam datang ke Tanah Melayu sejak kurun ke-9 lagi. Berdasarkan beberapa sumber sejarah, beberapa negeri di Malaysia dipercayai telah terlebih dahulu menerima Islam daripada Melaka. Kedatangan Islam di Kedah misalnya dikaitkan dengan penemuan batu nisan Syeikh Abdul Qadir bin Husin Syah Alam bertarikh 290 Hijrah. Batu nisan di Teluk Cik Munah, Pekan, Pahang yang bertulis ayat-ayat al-Quran dan syair Arab serta catatan tarikh si mati pada tahun 419 Hijrah juga menunjukkan kedatangan Islam ke negeri tersebut. Penemuan wang dinar di Kelantan bertarikh 577 Hijriyah yang menggunakan angka Arab merupakan satu lagi bukti kedatangan Islam ke Tanah Melayu. Di Terengganu, batu bersurat bertarikh 702 Hijriyah (1303 Masehi) dengan tulisan jawi yang menerangkan secara ringkas hukum-hukum Islam menjadi bukti penyebaran Islam ke negara ini (Abdullah Ishak 1995:122-123). Keempat-empat negeri tersebut, iaitu Kedah, Pahang, Kelantan dan Terengganu dipercayai telah terlebih dahulu menerima Islam berbanding Melaka. Ada beberapa teori yang dibuat mengenai kedatangan Islam ke Tanah Melayu. Teori pertama mengandaikan Islam datang dari Tanah Arab. Teori kedua berpendapat Islam datang dari China dan teori ketiga mengatakan Islam datang dari India. Namun demikian, apa yang lebih penting ialah bagaimana Islam telah tersebar ke Negara ini. Peranan ahli sufi dan pedagang silam dipercayai telah mencorakkan kehidupan masyarakat di Negara ini melalui usaha gigih dan pendekatan dakwah yang berkesan sehingga akhirnya Islam menjadi agama utama di Negara ini.

Senario dakwah sebelum merdeka lebih tertumpu kepada usaha pengislaman dan memberikan kefahaman dan penghayatan Islam yang berkisar kepada aspek-aspek fardu ain seperti masalah akidah (rukun iman, rukun Islam) dan ibadah ritual (sembahyang, puasa, zakat dan haji). Kerja-kerja dakwah dan cabarannya tidaklah begitu kompleks. Selepas kemerdekaan, senarionya mula berubah dengan cabaran yang

semakin kompleks dengan peningkatan jumlah penduduk yang lebih ramai. Dengan itu, dakwah tidaklah tertumpu semata-mata kepada aspek-aspek fardu ain semata-mata, malah ia mula member penekanan kepada kepentingan fardu kifayah. Misalnya membincangkan keperluan pemeraksanaan ekonomi, politik, sosial dan pendidikan umat Islam. Skop dakwah mula menjadi lebih luas dengan keperluan menyampaikan Islam sebagai '*a way of life*'. Tugasnya menjadi lebih mencabar dengan pelbagai ragam mad'u yang terpaksa dihadapi.

Cabaran Dakwah Sebelum dan Selepas Merdeka

Perkembangan dan cabaran dakwah Islamiah di Malaysia berhubung rapat dengan pengaruh sejarah, sosio-budaya dan kerencaman corak hidup masyarakat. Ini boleh disimpulkan dengan situasi masyarakat yang majmuk. Kemajmukan masyarakat telah membentuk satu bentuk cabaran dakwah yang perlu difahami dan ditangani secara hikmah dalam konteks dakwah di Malaysia. Berdasarkan premis tersebut, adalah beberapa cabaran utama dakwah di Malaysia sebelum dan selepas merdeka yang dikenal pasti, iaitu:

1. Konflik atau perbalahan tafsiran agama (kaum tua-kaum muda)

Usaha mewujudkan reformasi dalam masyarakat Melayu melalui gerakan islah pada awal abad ke-20 mencetuskan konflik dalam masyarakat Melayu. Secara dasarnya, konflik yang berlaku ini dilabelkan sebagai konflik kaum muda-kaum tua. Perubahan yang cuba dibawa oleh tokoh-tokoh gerakan islah ketika itu seperti syed Syeikh al-Hadi dan Sheikh Tahir Jalaludin telah disalah tafsir oleh kumpulan establishment yang juga dikenali sebagai kaum muda. Idea-idea pembaharuan yang cuba dibawa tidak dapat mengakar secara menyeluruh ke dalam masyarakat Melayu kerana berlakunya penentangan daripada kaum tua yang boleh penerima gagasan pembaharuan yang cuba dibawa oleh tokoh-tokoh reformis. Konflik yang berlaku ini telah melambatkan proses perkembangan dakwah.

Senario yang berlaku hari ini, dengan pusingan konflik kedua yang cuba dicetuskan melalui usaha-usaha menghidupkan semula masalah furu'iyah seperti persoalan qunut, talqin, wirid dalam solat, bacaan yasin malam jumaat telah menambahkan lagi cabaran kepada gerakan

dakwah di negara ini. Orang awam telah menjadi gelisah dan keliru dengan cetusan semula konflik tersebut dan menjadi satu cabaran kepada dakwah untuk ditangani secara hikmah agar tidak menambahkan lagi kerumitan dan perpecahan sedia ada.

2. Masalah *man power*

Tenaga manusia adalah sebahagian daripada cabaran dalam dakwah sama ada sebelum mahupun selepas negara mencapai kemerdekaan. Statistik pengIslaman atau konversi yang semakin meningkat memberi cabaran baru kepada dakwah. PengIslaman non-Muslim adalah satu pentanda positif kepada kekuatan jumlah umat Islam, namun demikian masalah bimbingan mereka yang memeluk Islam ini merupakan satu masalah yang lain yang mahu tidak mahu perlu diselesaikan. Kekurangan aspek *man power* telah menimbulkan masalah dan kerumitan dalam memberikan bimbingan yang sempurna kepada saudara baru atau saudara Muslim ini.

3. Masalah pendekatan

Cabaran yang dihadapi dakwah sejak daripada dahulu sehingga sekarang mempunyai kaitan yang rapat dengan masalah pendekatan. Penguasaan masyarakat Islam secara umumnya tentang pendekatan dakwah yang betul masih lagi di peringkat minima. Sudah dimaklumi, ada di kalangan masyarakat Islam yang terlalu berpegang kepada fahaman bahawa apabila seseorang ingin memeluk Islam ia perlu terlebih dahulu dikhatan atau disunatkan. Begitu juga mereka yang memeluk Islam, didesak supaya melaksanakan sekaligus amalan-amalan sebagai seorang Islam. Pendekatan begini telah menimbulkan kesulitan kepada orang-orang yang baru memeluk Islam atau orang yang bercita-cita memeluk Islam. Justeru, ia memberikan cabaran yang rumit kepada dakwah untuk ditangani. Kebolehan pendakwah meng'akomodasikan' di antara *fiqh al-syar'i* (penguasaan/kefahaman dari sudut *knowledge*) dengan *fiqh al-waqi* (penguasaan/kefahaman tentang realiti) juga merupakan satu persoalan yang menjadi isu dalam konteks pendekatan dan proses 'delivery dakwah' secara berkesan.

4. Pertentangan dengan lain-lain ideologi dan pemikiran

Dakwah Islamiah di Malaysia juga menghadapi cabaran daripada serangan luar. Sebelum kemerdekaan, kedatangan penjajah dengan membawa bersama gerakan Kristianisasi di samping proses sekularisasi telah menjadi ancaman kepada perkembangan dakwah di negara ini. Seperti yang dinyatakan oleh Mohammad Redzuan Othman (2005:16) penguasaan Portugis ke atas Melaka telah menyediakan pengkalan dan pusat bagi menyebarkan agama Kristian di rantau ini. Kehadiran kuasa Portugis di Melaka bukan sahaja menjadi ancaman kepada perkembangan ekonomi Orang Melayu, dan malahan turut menggugat kesinambungan amalan agama mereka. Kedatangan British meskipun dilihat tidak begitu mencampuri secara langsung soal pentadbiran agama dan adat Orang Melayu, namun demikian kita harus ingat polisi penjajahan British seringkali dikaitkan dengan mesej '*God, Glory and Gold*'. Selepas kemerdekaan, British telah meninggalkan legasinya yang memberi kesan jangka panjang kepada perkembangan Islam, iaitu nasionalisme. Mereka telah memastikan tampuk kepimpinan dan pemerintahan dikuasai golongan nasionalis dengan meninggalkan para Islamis. Agenda ini telah member kesan dalam melambatkan proses kebangkitan Islam dan dakwah. Nasionalisme telah menjadi senjata dan benteng yang berkesan dalam menyekat arus perkembangan dakwah, bukan sahaja di negara ini, tetapi juga negara-negara Islam lain yang dijajah British. Sehingga kini, kewujudan nasionalisme dan para nasionalis merupakan cabaran yang terpaksa dilalui dalam konteks perjalanan dakwah di negara ini.

Timbulnya bermacam-macam isme dan ajaran baru yang menyesatkan terus menghimpit dakwah dari pelbagai sudut. Munculnya budaya popular seperti yang diungkapkan Zulkiple Abd.Ghani dan Faisal Ashaari (2008:137) khususnya berkaitan muzik dan filem yang dieksploitasi bagi mengaut keuntungan dan kelahiran golongan liberal dengan penjenamaan tertentu terus menjadi laluan berliku yang melambatkan lagi perjalanan dakwah untuk menuju destinasi.

5. Menyelesai masalah Umat Islam

Permasalahan, kemelut dan krisis yang melanda masyarakat Islam menjadi antara cabaran besar kepada dakwah di negara ini. Sebahagian

besar usaha-usaha dakwah (dalam konteks perbincangan dari sudut terminology terdapat di kalangan penulis lebih cenderung menyatakan dakwah terhadap orang-orang Islam disebut sebagai islah) terpaksa ditumpukan kepada menyelesaikan permasalahan umat Islam. Oleh itu, jangkauan dakwah keluar, iaitu kepada Non-muslim agak terhad meskipun ada usaha-usaha kearah itu, misalnya oleh PERKIM dan Bahagian Dakwah dan Bukan Islam JAKIM serta Bahagian Dakwah Jabatan-jabatan Agama Islam Negeri, namun tumpuan dakwah sebahagian besarnya masih lagi kepada orang Islam.

Kesimpulan

Dakwah sebelum dan selepas merdeka menghadapi situasi dan bentuk cabaran yang berbeza sesuai dengan perkembangan zaman atau maa yang berbeza. Cabaran dakwah sebelum merdeka Nampak lebih simple kerana mungkin jumlah penduduk yang masih sedikit. Perkembangan selepas merdeka menampakkan cabaran yang lebih kompleks dengan pertambahan jumlah penduduk disertai dengan keragaman mad'u, juga lain-lain perkembangan baru termasuklah teknologi informasi yang membawa bersama nilai-nilai tertentu. Hal ini merupakan cabaran yang terpaksa dihadapi dengan pendekatan yang berhikmah oleh para daci. Kegagalan menangani cabaran dengan hikmah akan memberikan impak negative kepada dakwah. Justeru, pendakwah mestilah mempunyai bekalan dakwah yang cukup dan bersedia dalam menempuh cabaran dakwah.

Rujukan

- Abdullah Ishak. 1995. *Pendidikan Islam dan pengaruhnya di Malaysia*. Kuala Lumpur: Dewan Bahasa dan Pustaka.
- Abdul Rahman Haji Abdullah. 1998. *Pemikiran Islam di Malaysia*. Kuala Lumpur: Dewan Bahasa & Pustaka.
- Hall, D.G.E, 1961. *A history of South East Asia*. London: Oxford University Press.
- Mohammad Redzuan Othman. 2005. *Islam dan Masyarakat Melayu peranan dan pengaruh Timur Tengah*. Kuala Lumpur: Penerbit Universiti Malaya.
- Kassim Thukiman. 2002. *Malaysia perspektif, sejarah dan politik*. Skudai: Penerbit Universiti Teknologi Malaysia.

Zulkiple Abd.Ghani dan Muhammad Faisal Ashaari. 2008. “Budaya populer dan pengaruhnya kepada generasi muda Islam”. Dalam *Prosiding Seminar Antarabangsa Dakwah dan Pembangunan Belia*. disunting oleh Abdul Ghafar Don. Kuala Lumpur: YADIM